

հիւսիսից՝ զինւած թուրք զիւղացիները: Հայ դաղթականութիւնն ու նա-
հանջող զօրամասերը թալանուում ու կոտորուում էին ամէն կողմ:

Թիւրքերի հիւսիս շարժելու հետեանքով անասելի իրարանցում առաջ
եկաւ և Թիֆլիսում՝ վրաց և հայկական շրջաններում: Վրացիները սկսեցին
պատրաստել զիմադրութեան: Թիֆլիսը յայտարարեց պաշարողական վի-
ճակում. զօրաշարժի ենթարկեց կարմիր գւարդիան: Քաղաքի շուրջը,
բարձունքների վրա, դիրքեր փորեցին, նշանակեցին պահակներ:

Անտանէլին, սակայն, հայ ժողովրդի, Թիֆլիսում խոնւած կարսեցի,
չիրակեցի, արեւմտահայ բազմահազար դաղթականութեան վիճակն էր: Մա-
նաւանդ, շատ էին ջղայնանում արեւմտահայերը, որոնք, հասկանալի պատ-
ճառներով, աւելի էին սարսափում թիւրքական արշաւից: Նրանց դրութիւնը
ահռելի էր: Ի՞նչ անել: Ո՞ւր գնալ: Եւ ահա ծայր տեց մի խուճապային
փախուստ դէպի Հիւսիսային Կովկաս: Հազարաւոր մարդիկ, ծեր ու երե-
խայ, զիւղացի ու քաղաքացի, աշխատաւոր ու մտաւորական, — ով ինչով
կարող էր — խուժեցին դէպի ռազմավիրական ճանապարհը: Հոսանքի մի
ծայրը հասել էր արդէն Վլադիկաւկազ ու Արմաւիր, մինչ միւսը դեռ նոր էր
դուրս գալիս Թիֆլիսից: Օրեր անընդհատ, Թիֆլիսից շարժուում էին հազա-
րաւոր սայլեր, կռքեր, ինքնաշարժներ, դրաստներ, Փուրզոններ՝ բեռնա-
ւորւած տնային իրերով, կանանցով ու երեխաներով: Շատերը իրենց
ունեցւածքը չնչին դնով ծախում էին Թիֆլիսի փողոցներում — գորգ,
կապերտ, բարձ, անկողին, վերմակ, կարասիներ, ամանեղէն... Վլադի-
կաւկազ դնացող փոխադրութեան միջոցների սակազինը բարձրանում էր
տասնեակ ու հարիւրաւոր անգամներ: Մի մարդու տեղը Փուրզոնում արժէր
մինչև 10,000 ռուբլի: Մարդիկ վերջին կողպէկն էին տալիս, միայն թէ կա-
րողանան հեռանալ:

Թիֆլիսից Հիւսիսային Կովկաս մեկնեց և Ապահովութեան Խորհուրդը
ամբողջ կազմով: Այս պարազան աւելի ևս սաստկացրեց ընդհանուր խուճա-
պը: Գաղթը կատարուում էր անկազմակերպ, տարերային կերպով: Պարենա-
ւորման գործը ճանապարհին չափազանց անբաւարար էր, ապահովութիւն
չկար, և յարձակումները դաղթականների վրա սովորական էին: Այսպէս,
մայիս 23-ին Լարսից հեռագրում էին Հ. Ազգ. Խորհրդին. «Այսօր ինգուշ-
ները Նոր-Լարս կայարանում պահեցին աւելի քան 10,000 դաղթականներ,
թոյլ չաւին գնալու Վլադիկաւկազ և վերադարձրին Կաղբէք, ուր նրանց
սպասում է սովն ու ցուրտը»:

Մայիս 25-ին Ազգ. Խորհրդի ներկայացուցիչը հեռագրում էր Գու-
չէթից. «Հարիւր հազար սոված ու մերկ դաղթականներ հաւաքել են
Մցխեթի, Գուչէթի միջև և աւելի հեռուները: Ո՛չ մի օգնութիւն և ո՛չ մի
տեղից: Փախստականների մէջ սկսուում են հիւանդութիւններ: Կան մահուան
դէպքեր: Գիշերելու տեղ չկայ, և ամենքը գիշերում են բաց երկնքի տակ,
ցրտին: Չկայ ո՛չ հաց, ո՛չ եռացրած ջուր. չկան սննդատու կայաններ —
ամենքը թողնւած են ճակատագրի կամքին: Բժշկական օգնութիւն էլ չկայ:
Մարդիկ հազարներով գնում են ստքով, առանց օգնութեան որևէ յոյսի...
կացութիւնը յուսահատական է»: